



SAOPŠTENJE ZA MEDIJE

HITNO USVOJITI ZAKON O BESPLATNOJ PRAVNOJ POMOĆI

Sarajevo, 13.09.2013.

Konstantno odgađanje da se usvoji zakon o besplatnoj pravnoj pomoći na državnom nivou ugrožava prava socijalno ugroženih kategorija stanovništva da pristupe pravosuđu i time zaštite svoja osnovna ljudska prava. Parlamentarna skupština BiH, pod uticajem različitih lobija, već dugi niz godina odbija da usvoji okvirni zakon koji bi usaglasio zakonodavstvo u ovoj oblasti i time garantovao jednak pristup pravdi svim građanima u BiH uz obezbjeđenje jedinstvenih standarda usluga na svim nivoima vlasti, zaključeno je danas na konferenciji “Pristup građana informacijama, savjetima i aktivnoj pomoći sa osvrtom na postojeći sistem besplatne pravne pomoći u Bosni i Hercegovini.”

Konferencija je održana 12. i 13.09.2013. godine u Sarajevu u organizaciji Asocijacije za demokratske inicijative (ADI) i Centra za ljudska prava Univerziteta u Sarajevu, a u saradnji sa članicama Mreže pravde u BiH – mreže koja okuplja 64 nevladine organizacija koje djeluju u sektoru pravde - i organizacije ECAS (European Citizens Action Service) iz Belgije. Konferencija je održana uz tehničku podršku USAID Projekta razvoja sektora pravosuđa II i Evropske komisije.

“Nakon detaljne analize ustanovili smo da ne postoje ustavne prepreke za usvajanje okvirnog zakona o besplatnoj pravnoj pomoći,” – izjavila je Snježana Ivandić Ninković, direktorica Asocijacije za demokratske inicijative (ADI), koja je zajedno sa vodećim predstavnicima državnih, entitetskih i kantonalnih institucija, kao nevladinih organizacija koje se bave pružanjem besplatne pravne pomoći u BiH analizirala vodeće zakonodavstvo u navedenoj oblasti. “Time nije jasno zašto Parlament BiH odbija da usvoji zakon koji je Ministarstvo pravde BiH dostavilo na usvajanje u nekoliko navrata,” – dodala je Ivandić Ninković i naglasila činjenicu da je potreba za pravnom pomoći velika jer više od 40% stanovnika u BiH je siromašno, s tim da gotovo jedna četvrtina stanovništva dodatno se nalazi na ivici siromaštva.

Pored pružanja besplatne pravne pomoći, javne institucije na svim nivoima vlasti dužne su osigurati svim građanima, posebice osobama slabog materijalnog statusa, informacije i savjete kako bi mogli lakše ostvariti prava koja potražuju. Na skupu je također ukazano na potrebu široko postavljene mreže davatelja informacija i uputa, a davanje pravnih savjeta i pomoći ograničiti na kompetentne specijalizirane organizacije koje bi trebale proći adekvatan sistem osiguranja kvaliteta. Građani su primorani da «idu od šaltera do šaltera» u potrazi za odgovorom na svoj problem. “Nedostatak pravovremenog informiranja građana u stanju potrebe je ključan i može biti kamen spoticanja u ostvarivanju pravne zaštite”- smatra Saša Madacki, direktor Centra za ljudska prava Univerziteta u Sarajevu. Na kraju, zaključeno je da je neophodno aktivnije raditi sa svim pružaocima informacija, savjeta i besplatne pravne pomoći kako bi se unaprijedio njihov kvalitet rada i učinak, te osigurao pristup ovim uslugama građanima i građankama u svim dijelovima zemlje, u svim zajednicama, a posebno u ruralnim i ekonomski i socijalno ugroženim područjima.

Asocijacija za demokratske inicijative Sarajevo i Centar za ljudska prava Univerziteta u Sarajevu

Kontakt osoba: Snježana Ivandić Ninković – 061 131 856, snjezana@adi.org.ba